



Lalatak Konflitu Iha Eleisaun Jeral 2017

Mahein Nia Lian Nú. 117, 21 Novembru 2016



Foto Fundasaun Mahein, 2012

Fundasaun Mahein (FM)

Website: www.fundasaunmahein.org

2016



Kontiudu sira

Kontiudu sira	2
Introdusaun	3
Metodolojia	4
Kompetisaun entre lideransa tuan sira	4
Eleisaun direita ba lideransa FRETILIN 2016	6
Politizasaun ba orgaun eleitoral	7
Eleisaun ba lideransa suku 'iha situasaun emerjensia'	8
Asuntu UNTAS no eleisaun	10
Konflitu nia lalatak iha rai-laran	11
Independênsia instituisaun seguransa	13
Rekomendasaun	17
Bibliografia	19
Lista ema ne'ebé partisipa iha entrevista no FGD	20



Introdusaun

Sura loron deit ona hodi hakat ba Eleisaun Jeral 2017 tantu eleisaun ba Prezidente Repúblika no Parlamentu Nasional. Partidu polítiku ho nia lideransa sira dadaun ne'e okupadu tebes tun-sa'e foho hodi halo kontaktu eleitoral no konsolidasaun estrutura partidu nune'e mos konferensia no kongresu sira husi nivel munisipal to'o nasional. Iha tempu hanesan partidu polítiku sira aumenta maka'as kompara ho eleisaun sira dahuluk ka antes ne'e. Signifika festa demokrasia ba periodu ida ne'e nia sei "rame" liu-tan. Ida ne'e ejije servisu ida husi orgaun sira ne'ebé tau matan ba eleisaun nian ho independente no profesional inklui membru sira husi forsa defeza no seguransa nian.

La'os buat foun ida kona-bá problema polítika no seguransa iha Timor-Leste nia istoria eleisaun. Eleisaun dahuluk tinan 2001 hafoin Konsulta Popular 1999, Timor-oan sira halo eleisaun ba Assembleia Konstituante ne'ebé ikus mai transforma ba Parlamentu Nasional nomos tinan tuir mai 2002 eleisaun ba Prezidente Repúblika. Situasaun polítika no seguransa sai manas liu iha istoria eleisaun Timor-Leste nian iha tinan 2007 hafoin krize polítika 2006¹ no eleisaun 2012² ne'ebé misaun Nasoens Unidas besik atu ramata.

Timor-Leste iha esperiensia lubuk ida ona iha eleisaun sira liu ba ho violênsia. Maske violênsia sira ne'e balu la iha ligasaun direta ho eleisaun maibe prova ida katak situasaun antes eleisaun demonstra uluk ho violênsia no depois rezultadu eleisaun nian. Iha eleisaun jeral 2007 dahuluk liu ho krize polítika 2006 nia marka istoria violênsia ida ne'ebé halo Timor-oan sira halai fahe-malu no kontinua kedas ho violênsia sira liga ho Grupu Arte Marsiais (GAM).³ Iróniku aumenta maka'as liu-tan iha durante kampaña eleitoral ba eleisaun Prezidente Repúblika no Parlamentar. Situasaun ne'ebé grave liu depois rezultadu eleisaun Parlamentar nian hanesan akontese iha Viqueque, Baucau, Dili no Ermera inklui munisipiu balu.

Nune'e mos iha eleisaun 2012 durante kampaña eleitoral no depois eleisaun ka rezultadu eleisaun nomos formasaun Governu sosa ho ema nia mate. Akontesementu grave liu iha kapital nasaun nian no rejista insidenti grave ida husi atuasaun polisia nian tiru mate mane estudante ida iha Hera-Dili.⁴

Buat prinsipal ida ne'ebé dadaun ne'e públiku tomak preokupa kona-bá estabilidade polítika no seguransa. Situasaun rua ne'e ita hotu la bele ignora iha eleisaun ne'ebé besik ona no tuir planu sei realiza iha fulan Marsu 2017 Eleisaun ba Prezidente Repúblika no Juñu 2017 Eleisaun Parlamentar. Hanesan hatete tiha ona husi líder

¹ Relatóriu Avaliasaun kona-ba Violênsia Armada iha Timor-Leste (TLAVA). Violênsia Eleitoral iha Timor-Leste: identifikasaun no avaliasaun ba insidente no resposta sira. No. 3, Juñu 2009.

² Eleisaun 2012 rejista insidenti fatal ida iha Hera-Dili ne'ebé hamate mane joven estudante ida hafoin eleisaun. Maske nune'e em-jeral insidenti menus liu kompara ho Eleisaun 2007.

³ Relatóriu Avaliasaun kona-ba Violênsia Armada iha Timor-Leste (TLAVA). Grupu sira, gang sira no violênsia armada iha Timor-Leste. No. 2, Abril 2009.

⁴ Relatóriu Fundasaun Mahein, Jullu 2012.



Timor-oan nian hanesan mos Xefe Negosiador ba Fronteira Maritima Timor-Leste ho Australia Xanana Gusmão katak 'kuidadu, ema sei sobu ita iha eleisaun 2017, liu-liu ba joven sira kuidadu-an inklui forsa armada no polísia, tamba ema sei uza osan hodi estraga rai doben ida ne'e'.⁵ Nune'e, relatóriu ida ne'e hanesan nota informasaun ida ba diskusaun sira kona-bá situasaun polítika no seguransa antes eleisaun jeral 2017.

Metodolojia

Hodi kompriende kontestu sira kona-bá situasaun polítika no seguransa antes Eleisaun Jeral 2017 dahuluk liu Fundasaun Mahein (FM) hahu diskusaun inisial ida ho metodu ne'ebé adopta maka *Security Sector Discussion* (SSD). SSD hanesan metodu diskusaun inisiu ida ne'ebé involve peskizador sira husi FM rasik hodi diskute asuntu prinsipal sira liga ho setor seguransa nian no análiza ba dadus ne'ebé rekolla hodi hamosu rekomendasaun prinsipal sira

Depois diskusaun halo mos revizaun ba literatura sira ne'ebé relasaun ho eleisaun nian liga ho asuntu sira polítika no seguransa. Halo mos konsulta ka entrevista pesoal sira iha nível nasional ho autoridade sira husi Polícia Nacional Timor-Leste (PNTL), Provedoria Direitos Humanos e Justiça (PDHJ), akadémiku, NGO sira, advogadu no observador balu. Prosesu ketak ida husi ida ne'e, halo mos *Focus Group Discussion* (FGD) iha nível nasional ho jornalista sira ne'ebé halo kobertura iha asuntu polítika no seguransa nian. Nune'e mos ho grupu juventude husi munisipiu rua hanesan Manufahi no Liquiça. Entrevista pesoal hamutuku ema na'in 10 no FGD ho ema na'in 25 ne'ebé hala'o entre fulan Jullu to'o Agustu 2016.

Kompetisaun entre lideransa tuan sira

Situasaun polítika dahuluk liu mosu iha Parlamentu Nasional Timor-oan nian ema barak hatete katak ne'e 'konjuntura polítika foun' mosu konsensus ida entre representante povu iha uma fukun. Análiza seluk mosu katak saida maka sei akontese iha tempu tuir mai kona-bá polítika ne'e?

To'o tinan rohan 2013 iha debate boot ida iha Centro Convenção Dili (CCD) Primeiru Ministru Xanana Gusmao ko'alia kona-bá ninia rejignasaun husi kargu ne'e.⁶ Maske debate ne'e rasik ninia sirkuntansia oin-seluk maibe mosu deklarasaun ida halo públiku tomak dúvida maka'as. Idak-idak koloka ninia argumentu no nia sentru análiza liga ho polítika no seguransa. Portantu ho rejignasaun ne'e públiku nia dúvida kona-bá estabilidade polítika no seguransa wainhira entrega ba jersaun foun. Primeiru Ministru rasik mos preokupa kona-bá ida ne'e maibe nia fiar metin

⁵ Notisia Timor Post, Ioron 12 Setembru 2015

⁶ Debate entre Primeiru Ministru Xanana Gusmao ho Mauk Moruk. Maibe Mauk Moruk rasik la partisipa iha debate ne'e ho ninia razaun rasik. Novembru 2013.



katak tempu duni ona atu entrega ba jersaun foun sira hodi lidera,⁷ no desizasaun kona-bá irresivel ka sei la muda.⁸

Situasaun ida ne'e konfirma iha tinan tuir mai inisiu 2015 no desizaun ida ne'ebé halo ema hotu la espera atu akontese, rejignasaun ho remodelasaun. Ajenda tranzisaun ka tranferensia poder husi jersaun tuan ba jersaun foun realiza ho nomeasaun Primeiru Ministru foun mai husi partidu opozisaun.⁹ Buat komum ida ne'ebé bele justifika kona-bá nomeasaun ne'e 'interese nasional' no Primeiru Ministru foun Dr. Rui Maria de Araujo mos hato'o iha ninia diskursu dahuluk rasik wainhira simu pose.

Maske nomeasaun no formasaun governu husi remodelasaun ne'e la'o ho situasaun hakmatek. Maibe buat ida ne'ebé públiku bele haree katak líder husi partidu sira iha governu nia laran hasai husi membru governu ka la nomeia fila-fali,¹⁰ nune'e mos membru governu balu husi partidu Congresso Nacional de Reconstrução de Timor-Leste (CNRT) rasik.

Situasaun tuir mai hasai Partidu Demokratiku (PD) husi bloku koligasaun no ejijsia maka'as ida mai husi membru partidu CNRT sira katak membru sira husi PD tenke rejigna-an ona husi membru governu tamba PD hasai ona husi bloku koligasaun. Maske nune'e membru governu sira husi PD kontinua mantein iha governu ho pozisaun independente tuir ejijsia husi membru sira partidu CNRT nian.

Iróniku liu-tan situasaun iha Parlamentu Nasional, hasai membru ida husi partidu CNRT nu'udar partidu maioria, Vicente Guterres husi nia kargu hanesan Prezidente Parlamentu Nasional.¹¹ Ida ne'e akontese wainhira mosu polêmika ida entre Governu no Prezidente Repúblika kona-bá nomeasaun ka rekondusaun ba lideransa FALINTIL-Força de Defesa de Timor-Leste (F-FDTL) nian. Iha ne'ebé Governu nia proposta rekondusaun ba mandatu Chefe Estado Maior General F-FDTL Major General Lere Anan Timur no Vice-Chefe Estado Maior General Brigadeiro General Filomeno Paixão de Jesus. Maibe Prezidente Repúblika nia desizaun rejenta proposta ne'ebé governu apresenta ho razaun tranzisaun ba lideransa Forsa Armada (F-FDTL).¹²

Polêmika kona-bá lideransa F-FDTL la'o dadauk, diskursu Prezidente Repúblika Taur Matan Ruak nian ba nasaun iha Parlamentu Nasional hato'o preokupasaun no kritika balu direje direktamentu ba Xanana Gusmão no Marii Alkatiri kona-bá

⁷ Primeiru Ministru hato'o liu husi RTTL, Programa Ita Nia Governu, Janieru 2014.

⁸ Hato'o iha CCD wainhira halo debate ida entre Primeiru Ministru Xanana Gusmao ho Mauk Moruk maibe Mauk Moruk rasik la partisipa iha debate ne'e, Novembru 2013.

⁹ Nomeia Dr. Rui Maria Araujo nu'udar Primeiru Ministru husi partidu opozisaun, FRETILIN.

¹⁰ Sekretariu Jeral PD Mariano Sabino hasai husi kargu Ministeru Agrikultura no Prezidente Frente Mudansa Jose Luis Guterres hasai husi kargu Ministeru Negosiu Estranjeiru no Kooperasaun. Maibe Prezidente PD Fernando Araujo "Lasama" musa husi kargu Vice-Primeiru Ministru ba Ministeru Koordinator Asuntu Sosial no Ministeru Edukasaun.

¹¹ Kargu ba Prezidenti Parlamentu Nasional troka husi membru ida husi partidu CNRT Aderito Hugo ne'ebé antes ne'e hanesan Vice-Prezidenti Parlamentu Nasional.

¹² Haree mos relatóriu Fundasaun Mahein, 23 Feveiru 2016.



governasaun no projetu Zona Especiais de Economia Social de Mercado (ZEESM). Responde ba ida ne'e politiku no deputadu sira husi partido CNRT no Frente Revolucionaria de Timor-Leste Independente (FRETILIN) resposta hasoru kedas Prezidente Repúblika nia diskursu iha loron tuir mai hafoin diskursu ne'e.

Iha sorin seluk, durante entrevista iha peskiza ida ne'e nian partisipante sira mos hato'o katak la'os segredu ona kona-bá Prezidente Repúblika Taur Matan Ruak sei lidera partido foun ida ne'ebé dadaun ne'e organiza-an maka'as hela maka Partidu Libertasaun Popular (PLP). Ida ne'e sinal ida katak Eleisaun Jeral 2017 sei iha kompetisaun ne'ebé maka'as. Portantu ho figura líder istoriku sira lidera partido boot rua hanesan CNRT no FRETILIN no ho prezensa PLP nian ne'ebé sei lidera husi Taur Matan Ruak.¹³ Atu dehan katak eleisaun ne'ebé mai sei domina no kompetisaun entre líder jersaun tuan sira. Ho hanoin seluk katak povu sei la eskolla partido politiku nia programa maibe sei hili lideransa sira ne'ebé lidera partido ne'e.

Eleisaun direita ba lideransa FRETILIN 2016

Eleisaun Direita Lideransa FRETILIN iha loron 3 Setembru 2016 meius politiku atu hatene dahuluk ba sira nia vitoria ho derrota nia. Iha eleisaun ida ne'e partido FRETILIN konkista nia vitoria maka boot liu duke nia derrota. Total votante 193.229 (97.13%) votu validu husi 196.836 total votante ne'ebé vota ba Lu Olo-Marii, no 5.550 (2.87%) lae ba Lu Olo-Marii.¹⁴ Husi porsentu 97.13% ba Lu Olo-Marii bele sai sasukat husi partido FRETILIN hodi demonstra vitoria ba preparasaun eleisaun jeral 2017 mai. Nune'e mos porsentu 97.13% ba Lu Olo-Marii komesa lekar ona iha teritoriu nasional Timor-Leste ba partido FRETILIN nia militante no simpatizante katak ne'e sasukat boot ida atu uza iha eleisaun jeral 2017. Militante FRETILIN iha baze kaer metin persentazen ida ne'e, maibe lideransa FRETILIN seidak halo esplikasaun klaru kona-bá porsentu 97.13% ne'ebé votu validu ba Lu Olo-Marii.

Ho ida ne'e bele kompriende sala husi militante sira kuandu rezultadu iha eleisaun jeral 2017 oinseluk. Razaun rezultadu votu ba partido FRETILIN bele oinseluk ho razaun lubuk balun. Militante partido FRETILIN vota ba lideransa maibe iha eleisaun jeral 2017 bele la vota ba Partidu FRETILIN, tamba bele afilia ba partido seluk durante kampaña eleisaun nian. Ho razaun hirak ne'e bele hamenus persentazen ne'ebé dadaun ne'e iha. Karik ida ne'e akontese maka bele kria konflitu tamba militante sira la satisfas no kontinua kaer metin persentazen ne'ebé vota ba Lu Olo-Marii iha eleisaun direta ba lideransa FRETILIN nian 2016.

Votu 193.229 ka 97.13% bele hamosu ona kadeira 16, no iha eleisaun 2017 FRETILIN iha mehi boot atu hetan kadeira liu ida ne'e. Espetativa boot husi FRETILIN ba número kadeira iha Parleменту Nasional ne'ebé sukat husi rezultadu

¹³ Membre ida husi PLP hato'o katak ho prezensa PLP nian ne'ebé sei lidera husi Taur Matan Ruak implika maka'as ba partido boot sira hanesan CNRT, FRETILIN no PD. Tamba militante no lideransa husi partido hirak ne'e afila ona ba PLP. Liu-liu militante husi baze sira ne'ebé domina husi partdu boo tolu ne'e.

¹⁴ Eleisaun direta ba Prezidente no Sekretariu Jeral FRETILIN ho pakote úniku Lu Olo ho Marii Alkatiri.



eleisaun direta lideransan FRETILIN Lu Olo-Marii, ne'e bele hetan kompriensaun sala entre lideransa ho militante FRETILIN.

Lideransa FRETILIN bele kompriende karik iha mudansa persentazen, maibe militante FRETILIN dalaruma susar atu simu. Hanesan iha 2012 kuandu CNRT halo konferensia nasional hodi halo mos desizaun ba koligasaun no formasaun governu, militante FRETILIN la simu, tamba ho espetativa katak CNRT sei halo koligasaun ho FRETILIN. Karik situasaun hanesan ne'e bele akontese iha kontestu ida ne'e.

Politizasaun ba orgaun eleitoral

Relasiona ho polítika no polêmika entre lideransa nasional sira, iha tempu hanesan número partidu polítiku sira aumenta kompara ho eleisaun sira liu ba. Tuir dadus husi Comissão Nacional de Eleições (CNE) partidu polítiku ne'ebé rejista ona hamutuk 32. Partidu hirak ne'e barak liu mai husi partidu tuan sira ne'ebé kompete ona iha eleisaun sira dahuluk nian ne'ebé la iha asentu iha Parlamentu Nasional no mosu mos partidu foun sira seluk.

Durante peskiza ne'e, partisipante ida iha entrevista hato'o nia preokupasaun katak tantu partidu tuan no partidu foun balu presiza fiskalizasaun husi CNE kona-bá sira ezistensia no mekanismu rekrutamentu ba militante sira. Portantu iha partidu balu nia baze no organiza husi GAM sira. Maske GAM ne'ebé suporta ka nia baze ba partidu polítiku tuir rezolusaun Governu nian 2013 taka total ona nia atividade.¹⁵ Reforsa liu-tan husi partisipante seluk iha entrevista peskiza ida ne'e nian katak 'partidu polítiku balu uza maneira ka mekanismu arte marsiais nian hodi halo rekrutamentu ba militante sira hanesan liu husi juramentu no antes ne'e rekruta uluk ba membru GAM depois halo juramentu sai militante partidu, katak iha Eleisaun Jeral 2017 sei vota ba partidu ne'ebé sira halo ona juramentu ba'.

Ho kompleksidade situasaun no lalaok polítika sira iha leten ne'e, iha tempu hanesan Parlamentu Nasional redus komisariu sira husi CNE nian husi ema na'in 15 ba ema na'in 7. Kona-bá redusaun ba número komisariu sira husi CNE nian mosu preokupasaun katak sei iha implikasaun ba servisu CNE nian hodi fiskaliza ba eleisaun ne'ebé sei mai.¹⁶ Prezidente CNE Jose Belo¹⁷ altura ne'eba hato'o ona katak potensia sei mosu fraude eleitoral iha eleisaun jeral 2017, tamba polítika muda lei orgaun eleitoral hanesan CNE wainhira besik eleisaun no ida hatudu intensaun foer no anti-demokrasia.¹⁸ Karik ida ne'e hanesan presepsaun ida husi eis-Prezidente CNE nian no dalaruma ema hanoin katak ne'e deklarasaun husi pesoal ida nian. Maibe mos, bele dehan katak deklarasaun ne'e bele provoka diskusaun diak ida entre ulun boot sira no orgaun sira ne'ebé tau matan ba eleisaun hodi prepara tasak diak liu, iha momentu ne'ebé número komisariu CNE nia redus husi ema na'in 15 ba ema na'in 7.

¹⁵ Haree Rezolusaun Governu N^o.16/2013.

¹⁶ Entrevista ho Diretor NGO Belun, Luis Ximenes. 31 Agustu 2016

¹⁷ Prezidenti CNE sesante no atual hanesan membru Komisariu CNE bain-bain. Nune'e Prezidente CNE atual mak Komisariu Alcino Barris.

¹⁸ Timor Post, 3 Juñu 2016.



Nune'e mos servisu prinsipal ida ba CNE kona-bá asuntu 'sosa votu ka money politics'. FM alerta tiha ona asuntu 'sosa votu ka money politics' iha eleisaun 2012, iha ne'ebé partidu polítiku no kandidatu presidente repúblika balu utliza maneira ida ne'e hodi hetan votu iha eleisaun. Altura ne'eba CNE rasik liu husi media nasional kestiona asuntu 'sosa votu ka money politics' husi partidu polítiku no kandidatu presidente repúblika balu maibe la iha prosesu hasoru pratika sira ne'e.¹⁹

Situasaun ne'e fila fali sai diskusaun iha situasaun atual ba eleisaun 2017 nian wainhira partidu polítiku balu halo atividade partidária iha baze fahe osan ba nia militante sira. Maske seidak iha investigasaun ruma hasoru pratika ne'e maibe diskusaun ne'ebé la'o iha públiku no polítiku sira konsidera katak ida ne'e nu'udar pratika sosa votu. Iha fulan Jullu 2016, Sekretariu Jeral Konsellu Política Nasional PD no hanesan mos membru husi Parlamentu Nasional Virgilio Hornai hatete katak 'polítika osan ne'e buat ida ne'ebé kontra prinsipi demokrasia, tamba demokrasia ne'e tenke respeitu povu nia liberdade atu ba ezerse nia direitu síviku ne'e ho livre la'os lori osan ba fo fali ba sira'.²⁰

Relasiona ho eleisaun jeral ne'ebé sei realiza iha tinan oin (2017) presiza servisu maka'as husi entidade sira ne'ebé tau matan ba eleisaun hanesan CNE. Maibe ida ne'e mos dezafiu boot ba CNE rasik liu-liu redusaun ba número komisariu sira. Maske nune'e buat importante seluk maka presiza iha mekanismu fiskalizaun ida ne'ebé rigor husi CNE aleinde fiskaliza ba atividade sira kampañia eleitoral sira maibe mos husu partidu polítiku sira no kandidatu sira presiza deklarar kona-bá orsamentu ba partidu nian, orsamentu ba kampania eleitoral no fontes ba orsamentu hirak ne'e.

FM fiar katak mekanismu sira nune'e bele prevene pratika 'sosa votu ka money politics' husi partidu polítiku no kandidatu sira. Tamba iha ona indikasaun sira kona-bá 'sosa votu ka money politics' iha situasaun atual nian dirije ba eleisaun ne'ebé sei mai. Iróniku liu-tan mos kazu balu kona-bá produs no sirkula osan falsu iha rai-laran ne'ebé deskonfia husi elementu partidu polítiku balu.²¹ Portantu pratika sosa votu sei hafraku prosesu demokratizasaun ne'ebé dadaun ne'e la'o no soberania la'os ona iha povu maioria nia liman maibe soberania iha 'osan na'in nia liman' tantu husi rai laran nomos husi rai-liur.

¹⁹ Relatoriu Fundasaun Mahein, 06 Jullu 2012.

²⁰ Notisia Suara Timor Lorosa'e (STL), 01 Jullu 2016

²¹ Notisia Timor Post, 23 Agustu 2016



Eleisaun ba lideransa suku 'iha situasaun emerjensia'

Eleisaun ba lideransa suku nian antes ne'e la iha serteza husi alterasaun lejislasaun ba lideransa suku nian. Ikus mai eleisaun ba lideransa suku deside hala'o iha lora 30 Setembru 2016.²² Tuir Lei N° 9/2016, 8 Jullu, Lei Suku nian defini orgaun sira husi suku nian maka konsellu suku, xefe suku, asembleia aldeia no xefe aldeia.²³ Inklui mekanismu sira hodi realiza eleisaun ba orgaun sira suku nian no lideransa suku nian liu husi votasaun universal, livre, diretu, sekretu no pesoal, iha ne'ebé sei realiza iha tempu ne'ebé hanesan iha suku tomak.

Hodi realiza eleisaun ba lideransa suku nian, orgaun sira husi suku nian hanesan asembleia aldeia no konsellu suku nia papel importante tebes hodi lidera prosesu sira eleisaun nian. Asembleia aldeia nu'udar orgaun deliberativu aldeia nian.²⁴ Kompetensia husi asembleia aldeia maka hili xefe aldeia no representante delegadu sira (feto ida no mane ida) ba Konsellu Suku.²⁵ Konsellu suku maka orgaun deliberativu husi suku²⁶ no nia kompetensia sira ne'ebé atribui ba konsellu suku ho hili lideransa suku nian maka hili lia-na'in ida no representante juventude feto ida no mane ida iha suku.²⁷

Eleisaun ba lideransa suku nian ne'ebé antes ne'e atu realiza iha lora 30 Setembru 2016 maibe ikus mai adia ba lora 29 Outobru 2016. Antes ne'e FM ko'alia ona katak Lei ba Suku nian ida ne'ebé Prezidente Repúblika promulga fulan rua antes besik eleisaun²⁸ no la ho sosializasaun ne'ebé diak ba públiku. FM dúvida oituan kona-bá mekanismu ba realizasaun eleisaun nian, liu-liu preparativu sira, ne'ebé ho tempu badak deit no sei realiza iha nível aldeia 2225, no iha suku tomak 442. Portantu ho tempu badak ida ne'e dalaruma susar ba votante sira hodi kompriende diak mekanismu votasaun sira tamba ne'e bele kria konfuzsaun iha tempu votasaun no hamosu lamentasaun husi povu. Nune'e mos pesoal sira ne'ebé tuur iha meja eleitor nian hodi dirije prosesu eleisaun, iha ne'ebé la ho treinamentu ne'ebé diak hodi kompriende lalaok sira eleisaun nian. Oinsa mos ho kampaña husi kandidatu sira ba xefe aldeia no xefe suku nian? Iróniku liu-tan kandidatu sira ba xefe aldeia no xefe suku iha buletin votu nian hakerek deit naran kandidatu sira nian la ho fotografia hodi indika ema, ne'e kria konfuzsaun ba votante sira ne'ebé lahatene lee no hakerek hodi eskolla ka hili ninia kandidatu.²⁹

Aleinde husi mekanismu sira ba eleisaun nian susar mos ba PNTL halo planu operacional ida hodi asegura eleisaun ne'ebé realiza iha tempu hanesan iha suku tomak husi suku 442 iha aldeia 2225. Maske PNTL rasik koloka ona Oficial Polísia

²² Kalendarium eleisaun ba orgaun sira suku nian. Disponivel iha ne'e: <http://timor-leste.gov.tl/?p=16083>

²³ Lei N° 9/2016, 8 Jullu, Lei Suku nian, artigu 8, n° 2

²⁴ Lei N° 9/2016, 8 Jullu, Lei Suku nian, artigu 24, n° 24

²⁵ Lei N° 9/2016, 8 Jullu, Lei Suku nian, artigu 26 alinea a no b

²⁶ Lei N° 9/2016, 8 Jullu, Lei Suku nian, artigu 9

²⁷ Lei N° 9/2016, 8 Jullu, Lei Suku nian, artigu 12, n° 1 no 2

²⁸ Prezidenti Repúblika promulga iha lora 5 Jullu 2016 no eleisaun ba lideransa suku realiza iha lora 30 Setembru 2016.

²⁹ Lei N° 9/2016, 8 Jullu, Lei Suku nian, artigu 46 no 67



Suku (OPS) iha suku 442 maibe susar tau-matan iha aldeia hotu-hotu. Ida ne'e prezisa rekursu estra-ordinariu husi PNTL hodi asegura eleisaun ne'ebé sei realiza iha tempu badak.³⁰

Ikus mai Konsellu Ministru diside muda loron eleisaun nian husi 30 Setembru 2016 ba 29 Outobru 2016.³¹ Ho mudansa ida ne'e tuir Sekretariu Tekniku Administrasaun Eleitoral (STAE) bele prepara kondisaun diak bainhira realiza eleisaun. Liu-liu atu fo formasaun ba Konsellu Suku sira kona-bá prosesu apresentaaun kandidatura, votasaun no kontajen, nune'e autoridade lokal sira iha kuiñesementu hodi jere prosesu eleisaun suku. Aleinde ne'e Konsellu Ministru aprova mos regulamentu eleisaun suku ne'ebé fo dalan atu imprime buletin votu ho fotografia kandidatu sira nian, nune'e bele fasilita eleitor sira hodi hare kandidatu sira molok fo nia votu.³²

Ida ne'e hatudu katak preparativu sira hodi realiza eleisaun ba lideransa suku nian ladun tasak. Iha ne'ebé mosu lamentasaun barak husi parte sira ne'ebé bele dirije prosesu eleisaun nian ne'ebé ho tempu badak deit. Nune'e governu mos muda loron sira ba eleisaun nian tuir deit lamentasaun ka preokupasaun sira.

Asuntu UNTAS no eleisaun

Iha tinan 2011 antes eleisaun 2012, UNTAS (Uni Timor Asuwa'in) sai ona asuntu ida ne'ebé públiku Timor-Leste debate maka'as.³³ Iha tinan ida ne'e 2016 ne'ebé besik hakat ona ba eleisaun 2017 fila fali soke públiku nia atensaun. Tanbasá UNTAS sempre sai hanesan asuntu ne'ebé koloka iha prosesu polítika Timor-Leste nian?

Dalaruma iha hanoin seluk katak UNTAS la'os ameasa ba Timor-Leste maibe bele mos sai hanesan asuntu ne'ebé ita hotu labele ignora. Portantu agenda ba UNTAS iha nia primeiru kongresu tinan 2000 katak sei lori hikas Timor-Leste hodi integra fila fali ba Indonézia.³⁴ Agenda ida ne'e dalaruma hanesan 'sentimentu frustradu ida' tamba governu Indonézia rasik, ita bele kompriende katak nasaun ida ne'ebé promove maka'as paz no harmonia iha rejiaun. Nune'e mos sai hanesan nasaun ne'ebé promove maka'as interese Timor-Leste nian iha rejiaun, liu-liu adesaun ba ASEAN. Maibe sentimentu frustradu ida ne'e bele demonstra liu husi dalan saida ida deit hodi kria instabilidade polítika no seguransa iha Timor-Leste.

Tinan sanulu-resin liu tiha no dadaun ne'e UNTAS kontinua organiza-an no luta nafatin ba interese eis-refujiadu Timor-oan sira iha Timor Loromonu. Liu-liu atu hetan direitu ida nu'udar sidadaun Indonézia ho dignidade. Iha tinan ida ne'e mos pesoal

³⁰ Entrevista ho Segundu Komandante Jeral PNTL Komisariu Polisia Faustino da Costa no Komandante Operasaun PNTL Superintendente Xefe Polisia Henrique da Costa. Iha Kuartel Jeral PNTL, loron 2 Setembru 2016

³¹ Mudansa ka adia ba loron eleisaun nian bele asesu iha ne'e: <http://timor-leste.gov.tl/?p=16083&lang=pt>

³² Notisia husi Ajensia Notisial Timor-Leste (ANTIL), loron 15 Setembru 2015. Disponivel iha ne'e: <http://antil.tl/adia-eleisaun-suku-fo-biban-ba-stae-atu-prepara-kondisaun/>

³³ Haree relatóriu Fundasaun Mahein, loron 28 Abril 2011

³⁴ Haree relatóriu Fundasaun Mahein, loron 28 Abril 2011



balu hanesan eis-refujiadu lori eis-refujiadu hotu nia naran hato'o nia pedidu ba estadu Timor-Leste hakarak fila mai Timor-Leste.³⁵

Aleinde pedidu ba estadu Timor-Leste atu nune'e eis-refujiadu sira fila fali mai Timor-Leste. Mosu mos hanoin seluk katak eis-refujiadu sira sei harii no rejistu partidu UNTAS iha Timor-Leste. Nune'e mekanismu atu rejistu partidu UNTAS iha Timor-Leste, lider UNTAS Eurico Guterres hato'o katak 'iha dalam barak atu liu ba Roma'. Portantu UNTAS rasik iha ona organizasaun nukleu balu iha Dili no planu sei hale'u iha munisipiu sanulu resin-tolu husi nia liman-ain sira.³⁶

Nune'e mos eis-refujiadu sira ne'ebé atu fila mai Timor-Leste tuir Eurico Guterres hatete katak prontu hasoru justisa karik sala no simu konsekuensia sira wainhira fila. 'Tamba ne'e, labele tauk hanoin fila ba Timor karik ema ka'er, labele tauk ida ne'e. Polítika ne'e balun tenki tama kastigu, balun tenki mate, balun tenke moris hela, balun tenke lidera estadu no selu-seluk tan. Sé ita halo polítika tauk mate, tauk kastigu, lalika halo polítika. Polítika ne'e ba buat di'ak, no bem komun Timor tomak la'os ba án rasik, ba grupu, la'os ba feen-oan'.³⁷

Relasiona ho asuntu ne'e membru Parlamentu Nasional Antoninho Bianco hato'o ona katak eis-refujiadu sira la'os ona sidadaun Timor-Leste maske sira jersaun Timor-oan nian maibe sira sidadaun Indonézia. Nune'e wainhira fila tenke submete ba prosesu legal hodi hetan nasionalidade Timor-Leste.³⁸ Nune'e mos atu harii partidu UNTAS iha Timor-Leste resposta husi eis-Koordenador Divizaun Buka Lia Los CAVR Hugo Fernandes hatete katak atu harii partidu iha Timor-Leste tenke liu husi prosesu legal sira, nune'e molok harii partidu tenke ba hatan uluk prosesu justisa tamba eis-refujiadu balu komete krime grave iha tinan 1999. Nune'e mos organizasaun UNTAS rasik rejistu iha Indonézia no Konstituisaun RDTL la fo dalam ba ema estranjeiru atu harii partidu iha Timor-Leste.³⁹

Hanesan FM hatete tiha ona katak UNTAS dalaruma la'os ameasa ba Timor-Leste maibe labele ignora mos. Portantu ho dalam saida deit sira bele infiltra no hanesan lider UNTAS nian hatete tiha ona katak iha ona nukleu organizasaun nian iha Dili. Tamba ne'e potensia hodi demonstra asaun saida deit hodi justifika sira nia ezistensia. Nune'e mos bele hanesan propaganda polítika ida maibe ezistensia UNTAS nian iha tinan hirak liu ba mosu ona rumoris katak membru sira husi UNTAS haksubar-an ona iha Timor-Leste no sai polêmika boot iha tinan 2011.⁴⁰

Ida ne'e servisu boot ida ba Instituisaun seguransa hodi estuda no konfirma. Karik nune'e presiza medida preventiva, liu-liu situasaun sira ne'ebé sei provoka instabilidade iha Timor-Leste. Sai hanesan pergunta ba ita hotu katak tanbasá asuntu UNTAS sempre sai polêmika iha eleisaun 2012 no 2017? Nune'e mos

³⁵ Haree Timor Post, 13 Jullu 2016.

³⁶ Notisia Matadalan Semanal online, liron 16 Jullu 2016

³⁷ Notisia Matadalan Semanal online, liron 16 Jullu 2016

³⁸ Notisia Jornal Nacional Diario online, liron 3 Agustu 2016

³⁹ Notisia Matadalan Semanal online, Jullu 2016

⁴⁰ Haree relatóriu Fundasaun Mahein, liron 28 Abril 2011



situasaun seguransa rai laran nunka sees husi violênsia antes eleisaun no hanesan bain-bain ita hotu preokupa ho violênsia ka krime sira husi grupu, ninja, no autor sira ne'ebé laklaru?

Konflitu nia lalatak iha rai-laran

a. Rumoris kona-bá 'ninja'

"Ninja" sai rumoris iha comunidade iha fulan hirak ikus ne'e, sai nu'udar situasaun ida ne'ebé halo tauk no pâniku. Família sira iha suku no aldeia sira iha munisipiu preokupa maka'as kona-bá polêmika ne'e.⁴¹ FM simu keixa balu husi comunidade sira katak 'ninja' kalan-kalan la'o iha sira nia suku no comunidade relata situasaun ne'e ba polísia maibe la hetan responde ne'ebé diak.

Komunidade husi postu administrativu Ossu munisipiu Viqueque hato'o katak 'iha ami nia suku kalan-kalan ninja tama no comunidade sira fo seguransa iha suku laran'. Komunidade sira konsege kaptura ema ne'ebé deskonfia hanesan ninja maibe ikus mai identifika katak ema ne'e moras mental. Relasiona ho situasaun ne'e antes ne'e comunidade hato'o ona ba eskuadra PNTL maibe sira nia prezensa la iha no ida ne'e halo comunidade sira tauk oituan.

Situasaun tuir mai relasiona ho 'ninja' akontese mos iha munisipiu Baucau, postu administrativu Quelicai. Komunidade sira konsege kaptura mane ida ne'ebé deskonfia hanesan 'ninja' ho atributu sira hanesan surik ka "samurai", hatais rupa metan no taka metin nia oin. Ikus mai polísia identifika katak mane ne'e la'os 'ninja' maibe ema moras mental ida.

PNTL rekuinese katak kazu ninja iha Quelicai komplikadu tebes maske ema ne'e identifika moras mental ida maibe ninia movimentu no asaun sira iha ne'eba hanesan lolos buat ne'ebé ema hotu deskonfia 'ninja'. Oficial PNTL ida hato'o katak kazu ida ne'e iha ona prosesu investigasaun depois polísia halo kapturasaun.

Rumoris ne'e lakleur deit espalla to'o parte loromonu nasaun nian hanesan iha Dili, Ermera no Bobonaro. Maibe la identifika ema ruma husi asaun 'ninja' nian. Komandante Operasaun Interina PNTL Superintendente Polísia Natercia Martins altura ne'eba hato'o katak durante rumoris ne'e espalla PNTL la identifika ema ruma sai hanesan suspeitu ba kazu ne'e. Maske nune'e rumoris continua espalla no halo comunidade preokupa tebes no iha fatin balu comunidade sira tauk halo movimentu iha tempu kalan.⁴²

b. Asaltu ho 'rama ambon'

⁴¹ Entrevista Diretor JSMP Luis de Oliveira Sampaio, 25 Agustu 2016

⁴² Komandante Operasaun PNTL Interina PNTL Superintendente Polisia Natercia Martins hato'o iha debate interaktivu programa Radio Timor-Leste (RTL) nian. Juñu 2016.



Situasaun seluk iha kapital nasaun nian halo komunidade sira tauk la'o iha tempu kalan iha estrada públiku asaltu ho 'rama ambon'. Monitorizasaun FM nian identifika katak akontesementu sira nune'e maioria iha parte loromonu kapital nasaun nian. Husi insidenti sira ne'ebé akontese vitima barak liu mai husi mane joven balu ne'ebé la'o iha tempu loraik no kalan, akontesementu seluk mane joven ida sai vitima ba insidente ne'e wainhira sai husi misa iha tempu kalan parte Aimutin-Dili nian.

FM identifika katak vitima no suspeitu husi insidenti ne'e maioria involve husi eis-membru sira husi GAM nian (Persaudaraan Setia Hati Terate 'PSHT', Kera Sakti no Kmanek Oan Rai Klaran 'KORK').⁴³ Iha fulan Maiu 2016 PNTL kaptura suspeitu sira ne'ebé deskonfia involve iha asaltu ho rama ambon, no situasaun asaltu para oituan iha fulan ne'e. Maibe lakleur deit mosu fila fali iha fulan tuir mai.

Insidenti sira ne'e públiku nia presepsaun katak ne'e bain-bain ona wainhira besik eleisaun sempre mosu situasaun ne'ebé bele provoka instabilidade iha rai laran.⁴⁴ Relatóriu ne'e susar atu identifika ninia ligasaun maibe insidenti sira ne'e lidera ona situasaun sira antes eleisaun. Posibilidade públiku bele deskonfia no liga entre situasaun ka insidenti sira ne'e ho seguransa antes eleisaun. Tamba situasaun sira liu ba iha eleisaun Timor-Leste nian identiku ho violênsia no sempre demonstra iha antes no depois eleisaun.

c. Asaltu malu entre eis-membru GAM

Rezolusaun N^o. 16/2013 taka total ona atividade GAM ne'ebé identiku ho violênsia hanesan PSHT, Kera Sakti no KORK. Maibe insidenti sira ne'ebé liga ho grupu hirak ne'e kontinua akontese iha tinan hirak ikus ne'e. Durante intervista ho partisipante sira hato'o katak 'grupu ka organizasaun arte marsiais maka taka maibe atividade kontinua la'o iha komunidade nia leet no kontinua halo rekrutamentu ba membru foun sira no halo treinamentu iha tempu kalan'.

Partisipante seluk hato'o katak 'membru sira husi GAM dalaruma sira sadik malu lori arte marsiais sira ne'ebé taka tiha ona nia naran (PSHT, Kera Sakti no KORK)'. Insidenti sira husi eis-membru GAM rejista maka'as liu iha tinan 2014, 2015 no 2016 iha bairu sira kapital nasaun nian no munisipiu balu. Aleinde husi asaltu sira ho rama ambon rejista mos insidenti seluk ne'ebé akontese iha bairu entre eis-membru GAM sira.⁴⁵

Partisipante ida husi diskusaun grupu durante peskiza ida ne'e nian hato'o katak 'insidenti sira liga ho eis-membru GAM antes ne'e akontese bebeik ona hafoin rezolusaun governu nian iha tinan 2013. La'os ona segredu kona-bá ida ne'e no ita haree dalaruma eis-membru husi GAM hakarak provoka malu no promove liu husi

⁴³ Hare mos relatoriu ONG Belun, Agustu 2016

⁴⁴ Diskusaun ho jornalista sira iha Dili relata kona-bá situasaun seguransa liga ho eleisaun. Maske nune'e sira la indika katak situasaun sira ne'e provoka instabilidade iha eleisaun jeral ne'ebé sei mai (eleisaun 2017) maibe situasaun ne'e komesa demonstra ona antes hakat ba eleisaun.

⁴⁵ Haree mos relatóriu ONG Belun, Maiu 2015.



media sosial.⁴⁶ Iha ne'ebé insidenti no violênsia husi eis-membru GAM autor sira identifika balu mai husi PSHT, Kera Sakti no KORK'.

Ligasaun ho eleisaun jeral ne'ebé sei mai, relatóriu ida ne'e la'os atu julga katak eis-membru GAM sira sei provoca no kria violênsia durante kampaña eleitoral no depois fo sai rezultadu eleisaun. Maibe iha tendensia bele mosu no kampaña eleitoral hanesan oportunitade no eventu ida hodi provoca malu. Portantu partidu polítiku balu nia baze organizasaun no masa husi GAM no rekrutamentu ba militante sira ho juramentu doutrina GAM nian. Sai potensia liu GAM sira ne'ebé identiku ho violênsia durante ne'e no tuir rezolusaun governu nian 2013 taka total ona sira nia atividade. Maibe kontinua halo nia atividade ho subar-subar no halo rekrutamentu ba militante partidu nian. Nune'e mos juramentu hanesan 'obriga' atu comunidade sira tenke vota ba partidu refere.

Independênsia instituisaun seguransa

GAM (PSHT, Kera Sakti no KORK) taka tiha ona tuir rezolusaun ne'ebé Governu hasai ona iha tinan 2013. Nune'e mos membru sira F-FDTL no PNTL iha tinan 2014 halo ona juramentu hodi la involve iha GAM. Maibe asuntu GAM nafatin diriji ba membru sira husi F-FDTL no PNTL nia involvimentu. Partisipante ida iha FGD hatete 'grupu maka taka maibe atividade GAM nian kontinua la'o nune'e membru sira husi instituisaun rua ne'e nian mos liu-liu membru balu husi PNTL sei involve iha GAM maske halo ona juramentu maibe kontinua fo suporta ba atividade GAM nian. Identifika mos membru balun husi PNTL ho roupa sivil fo seguransa ba konsolidasaun partidu nian iha tinan hirak ikus ne'e'.

Aleinde husi involvimentu iha GAM, partisipante seluk husi FGD iha Dili hato'o kona-bá konfrontu sira entre membru PNTL ho F-FDTL ne'ebé ikus-ikus ne'e akontese. Iha ne'ebé partisipante ne'e konsidera konfrontu sira ne'e sistematikamente hodi provoca malu. Maske sira nia lideransa aviza bebeik ona kona-bá sira nia asaun. Maibe hanesan sadik ida ba aviza ne'ebé sira nia lideransa hasai. Bele nota katak konfrontu sira nune'e hahu husi Balibar Dili, mosu konfrontu seluk iha Ainaro membru ida husi F-FDTL halo agresaun hasoru membru PNTL ida, kontinua kedas agresaun seluk iha Bobonaro membru PNTL husi Batalhão Ordem Pública (BOP) halo agresaun hasoru membru F-FDTL ida no taka ho membru ida husi PNTL tiru membru F-FDTL ida iha Ainaro.⁴⁷

Nune'e mos brutalidade sira husi membru PNTL iha atuasaun sira hanesan ona buat bain-bain ida no rejista ho número ida maka'as. Aleinde hasoru membru comunidade bain-bain maibe hasoru mos estudante, médiku no jornalista. Inklui insidenti grave rua seluk iha Covalima tiru mate mane ida ho kondisaun moras mental no tiru kanek membru ida husi F-FDTL iha Ainaro.⁴⁸

⁴⁶ Públika video sira baku malu ka asaltu malu entre eis-membru GAM iha media sosial hanesan Facebook. Susar identifika autor ba públikasaun ne'e tamba utiliza ID falsu.

⁴⁷ Haree relatóriu Fundasaun Mahein, Agustu 2016

⁴⁸ Haree relatóriu Fundasaun Mahein, Jullu no Agustu 2016.



Relata ba insidenti sira ne'e FM alerta dalabarak ona kona-bá disiplina husi membru instituisaun rua ne'e nian ne'ebé presiza atensaun sériu husi komandu, departamentu no seksaun sira instituisaun nian.⁴⁹ Atuasaun sira nune'e públiku nia presepsaun jeneraliza reprezenta instituisaun nia naran. Maske instituisaun seguransa la hakiak grupu no pesoal sira ne'e hodi destroi instituisaun ne'ebé forma ho nia misaun boot tebes.

Asuntu seluk kona-bá membru ba forsa defeza no seguransa nia disiplina no nia independênsia iha eleisaun. Relasiona ho asuntu ne'e, FM aviza ona kestaun ida ne'e iha Eleisaun Jeral 2012 kona-bá forsa defeza no seguransa bele tuir eleisaun ka lae?⁵⁰ Portantu FM preokupa kona-bá sira nia independênsia iha eleisaun wainhira membru husi instituisaun rua ne'e ezerse nia direitu ba vota. Preokupasaun ida ne'e mosu opiniaun pro-kontra iha altura ne'eba, opiniaun pretenente ida mosu katak "F-FDTL no PNTL labele tuir eleisaun ka vota tamba preve iha Konstituisaun Repúblika bandu forsa defeza no seguransa labele partisipa iha política".⁵¹ Nune'e mos opiniaun seluk mos katak 'tuir eleisaun ka vota nu'udar direitu sidadaun ida nian'.⁵²

Relasaun ho polêmika iha leten ne'e husi parte defeza nian iha tinan 2012 Sekretariu Estadu Defeza Julio Tomas Pinto hato'o ona katak F-FDTL nu'udar sidadaun, sira bele ezerse sira nia direitu vota iha eleisaun no lei kondena wainhira uza farda ba vota. Tamba ko'alia kona-bá votasaun hau la'os ko'alia kona-bá partisipasaun política pratika, nu'udar sidadaun sivil, sira partisipa. Maibe, nu'udar militar, sira la bele tuir tamba Konstituisaun bandu."⁵³ Nune'e ikus mai membru husi instituisaun F-FDTL no PNTL ezerse nia direitu vota iha Eleisaun 2012.

Polêmika iha leten ne'e ba periodu Eleisaun 2017 ne'ebé besik dadauk, fila-fali sai atensaun husi FM. Iha asuntu pertenente ida ne'ebé presiza klarefika tuir lei nia haruka. Iha ne'ebé artigu balu husi Konstituisaun no lei-oan sira bandu labele partisipa direita ka indireita iha política maibe artigu seluk autoriza bele partisipa hanesan sidadaun.

Tuir lejislasaun sira ba Forsa Armada hatete 'F-FDTL labele iha partidu polítiku no tenke obedese ba órgaun soberanu kompetente sira, nu'udar Konstituisaun no lei, no labele iha intervensaun política naran ida'.⁵⁴ Nune'e mos ba polisia no forsa seguransa hatete katak 'Polisia defende legalidade demokrátika no garante

⁴⁹ Haree relatóriu sira husi Fundasaun Mahein kona-bá infrasaun disiplinar husi membru F-FDTL no PNTL. Disponivel iha: www.fundasaunmahein.org

⁵⁰ Relatóriu Fundasaun Mahein (FM), 2012. Militar ho Polisia Tuir Eleisaun ka Lae? Disponivel iha ne'e: <http://www.fundasaunmahein.org/wp-content/uploads/2012/01/MNL-no-29-31012012-F-FDTL-PNTL.pdf>. Asesu iha loron 02 Agustu 2016.

⁵¹ Haree mos Konstituisaun Repúblika aritgu 146 no 147.

⁵² Haree mos Konstituisaun Repúblika artigu 46 no 47.

⁵³ Notisia Jornal Suara Timor Lorosa'e (STL), Edisaun 06 Outobru 2011. Sita mos iha relatóriu Fundasaun Mahein (FM), 2012. Militar ho Polisia Tuir Eleisaun ka Lae? Disponivel iha ne'e: <http://www.fundasaunmahein.org/wp-content/uploads/2012/01/MNL-no-29-31012012-F-FDTL-PNTL.pdf>. Asesu iha loron 02 Agustu 2016.

⁵⁴ Konstituisaun RDTL artigu 146



sidadaun sira nia seguransa interna, no labele iha partidu polítiku'.⁵⁵ Nune'e mos regulariza espesifikamente iha sira nia lei organika idak-idak.

Ba F-FDTL nia lei organika rasik defini katak 'F-FDTL rigorozamente apartidária no ninia organizasaun mesak ida de'it ba nasaun tomak. Elementu F-FDTL nian, iha kualkér grau ka kategoria, labele partisipa direta ka indireta iha atividade política sira'.⁵⁶ Nune'e mos utilizaun uniforme iha tempu eleisaun ka votasaun bandu labele utiliza ka hatais uniforme iha atividade sira nia karatér polítiku, eleitoral ka partidariu.⁵⁷

Iha peskiza ida ne'e nian partisipante sira hato'o iha diferente opiniaun kona-bá membru F-FDTL no PNTL nia partisipasaun iha eleisaun hodi ezerse nia direitu votu. Partisipante ida hato'o katak 'membru F-FDTL no PNTL labele vota tamba sira vota signifika sira la neutru ona tamba hakarak ka lakohi eskolla partidu ida ka kandidatu ruma'. Reforsa husi partisipante seluk FGD iha Manufahi hatete 'eleisaun iha Timor-Leste hanesan 'futu manu' no nia rezultadu manan ka lakon, nune'e bainhira membru F-FDTL no PNTL vota sira sei suporta ka vota ba partidu polítiku sira no bainhira partidu ne'e lakon signifika sira mos lakon. Tamba eleisaun iha Timor-Leste 'eleisaun emosional' ema sei iha relasaun emosional ho partidu polítiku tamba Timor-Leste nia istoria rasik no relasaun emosional ho líder sira'.

Partisipante seluk hato'o katak 'membru F-FDTL no PNTL bele vota tamba nu'udar sidadaun hodi ezerse ninia direitu votu. Direitu votu la signifika involve ka partisipa iha atividade partidária ka política pratika. Nune'e bainhira sira la vota iha eleisaun signifika sira lakon direitu votu hanesan sidadaun. Maske sira nia lei bandu kona-bá involvimentu ka partisipa iha política maibe lahatete kona-bá labele vota'.

Manuel Tilman hanesan advogadu Timor-oan ida kuiñesidu no hanesan mos líder partidu politiku ida hato'o katak:

'Membru F-FDTL no PNTL bele vota tamba sira hanesan sidadaun hodi ezerse sira nia direitu no ida ne'e Konstituisaun garante katak soberania iha povu nia liman no ezerse soberania nu'udar Konstituisaun haruka. Direitu sira nune'e reforsa liu-tan husi Konstituisaun artigu 6 katak estadu defende no garante pais nia soberania, garante no promove direitu fundamental sira povu nian no garante demokrasia política no povu nia partisipasaun iha solusaun ba problema nasional. Nune'e mos artigu 7 Konstituisaun nian kona-bá povu ezerse poder polítiku ho sufrájiu universál, livre, iguál, diretu, sekretu no periódiku no ho meu sira-seluk ne'ebé Konstituisaun prevee. Reforsa liu-tan husi Konstituisaun artigu 46 no 47'.⁵⁸

Argumentu ne'ebé hanesan hato'o husi Adjuntu Provedor Direitus Umanus no Justisa (PDHJ) Horacio de Almeida hatete:

⁵⁵ Konstituisaun RDTL artigu 147

⁵⁶ DEKRETU-LEI NO. 15/2006. Estatuto Orgániku FALINTIL-FDTL nian. Artigu 1, N° 2 no 3.

⁵⁷ Decreto do Governo N° 7/2012 de 1 de Agosto. Regulamento de Uniformes das FALINTIL-Força de Defesa de Timor-Leste (RU/F-FDTL). Artigu 3 N° 5.

⁵⁸ Entrevista ho Dr. Manuel Tilman, loron 30 Agustu 2016



'Membro husi F-FDTL no PNTL bele vota tamba ne'e nu'udar direitu sidadaun nian no konstituisaun garante. Bainhira membru F-FDTL no PNTL la vota sira sei lakon sira nia direitu hanesan sidadaun. Maske Konstituisaun artigu 146 no 147 no lei organika F-FDTL no PNTL bandu sira labele partisipa atividade sira ho karater polítiku maibe lei ne'e rasik lahatete klaru kona-bá labele vota'.⁵⁹

Nune'e atu garante membru F-FDTL no PNTL nia independênsia iha eleisaun prezisa hadi'a sira nia dezempeñu no disiplina. Esperiansia hatudu ona katak iha eleisaun sira antes ne'e membru balu husi PNTL involve iha partidu polítika. Kazu iha eleisaun 2007 membru PNTL ida tiru mate militante ida husi partidu CNRT nian iha Viqueque, ne'ebé deskonfia membru PNTL ne'e suporta ba partidu polítiku ida. Nune'e mos kazu seluk ne'ebé akontese iha Manufahi no Manatuto membru balu husi PNTL involve no suporta ba atividade partidu polítiku balu.⁶⁰

Relasiona ho involvimentu membru F-FDTL no PNTL iha atividade partidária asuntu ne'ebé hanesan hato'o husi partisipante ida iha diskusaun grupu durante peskiza ne'e nian hatete:

'Iha eleisaun ne'ebé sei mai 2017, Instituisaun F-FDTL no PNTL prezisa iha mekanismu kontrolu ba nia membru sira ho rigorozu tamba membru balu husi F-FDTL no PNTL ami nota katak iha kotuk sira suporta atividade partidu nian, liu-liu partidu ne'ebé nia baze arte marsiais. Makse membru F-FDTL no PNTL halo ona juramentu hodi la involve iha arte marsiais maibe sira kontinua fo suporta ba arte marsiais'.⁶¹

Iha âmbito seluk kona-bá membru seguransa pesoal ka membru husi Kompañia Seguransa Pesoal PNTL ne'ebé fo seguransa ba lideransa partidu hanesan membru ba Governu no eis titular sira. Ida ne'e hanesan buat ida ne'ebé mosu dúvida kona-bá sira nia independênsia. Iha ne'ebé membru sira husi seguransa pesoal ne'e tinan barak ona sai seguransa pesoal ba líder partidu politiku, lora kalan la'o hamutuk no rona líder nia diskursu kona-bá partidu ida nia programa no polítika tomak. Membru seguransa pesoal ne'e edukadu diak ba partidu nia líder ne'ebé sira fo seguransa ba. Ida ne'e akontese tamba laiha rotasaun ida ne'ebé regular. Pesoal seguransa sira ne'e mos iha biban boot bele iha ligasaun emosional ba partidu ida tamba sira fo seguransa iha tinan barak nia laran ba pesoal lideransa partidu polítiku refere. Ho ida ne'e bele minimiza sira nia independênsia ba kna'ar profesional nia atu aseguara seguransa iha eventu saída deit iha Timor-Leste.

Rekomendasau

1. Asuntu polítika no seguransa tenke sai ajenda prinsipal ba debate públiku ida ne'ebé komponente hotu-hotu bele fo opiniaun nu'udar responsabilidade sidadaun nian hodi promove no garante paz no estabilidade iha eleisaun.

⁵⁹ Entrevista ho Adjuntu Provedor Direitus Umanus no Justisa (PDHJ) Horacio de Almeida, lora 26 Agustu 2016

⁶⁰ Entrevista ho Diretur NGO Belun, Luis Ximenes. 31 Agustu 2016

⁶¹ Partisipante ne'e la autoriza atu temi nia naran espesikamente ba kazu ida ne'e nian.



2. Lideransa partidu polítiku sira presiza promote komunikasaun polítika ida ne'ebé edukativu hodi eduka povu katak ne'e maka kultura demokrasia la'os kultura provoka malu.
3. Orgaun sira ne'ebé tau-matan ka fiskaliza ba lalaok eleisaun nian tenke rigor iha sira nia kna'ar no bele ezerse nia funsaun tuir lei hodi nune'e bele hasees husi polítiku sira nia intervensaun.
4. Orgaun sira ne'ebé tau-matan ba eleisaun presiza husu partidu polítiku sira nia relatóriu orsamentu ba partidu nian no orsamentu sira ba kampaña eleitoral nomos fontes orsamentu sira ba partidu hodi nune'e bele prevene pratika sira sosa votu.
5. Instituisaun seguransa sira hamutuk ho autoridade lokal liu husi Konsellu Seguransa Munisipal no Konsellu Polisiamentu Komunitaria (KPK) presiza halo avaliasaun ba risku no ameasa sira iha eleisaun ne'ebé sei mai hodi dezeña planu operacional ba prevensaun nian.
6. Instituisaun sira seguransa presiza haforsa mekanismu interna kona-bá disciplina membru sira nian, no halo rotasaun periodiku ba pesoal sira nune'e bele garante sira nia independênsia iha eleisaun no politizasaun husi polítiku sira.



Bibliografia

- Dekretu Lei N^o 15/2006. Estatutu Orgániku FALINTIL-FDTL nian.
- Decreto do Governo N^o 7/2012 de 1 de Agosto. Regulamento de Uniformes das FALINTIL-Força de Defesa de Timor-Leste (RU/F-FDTL).
- Dekretu Lei N^o 9/2009. Estatutu Organika Polícia Nacional Timor-Leste (PNTL).
- Konstituisaun Repúblika Demokratika Timor-Leste
- Lei N^o 9/2016, 8 Jullu, Lei Suku nian
- Relatóriu Belun, 2016. Insidente Detallu Liga ba Asalta Rama Ambon Ne'ebé Hakanek no Halakon Ema Nia Vida iha Kapítal Dili. Loron 23 Agustu 2016.
- Relatóriu Fundasaun Mahein (FM), 2012. Militar ho Polisia Tuir Eleisaun ka Lae? Disponivel iha ne'e: <http://www.fundasaunmahein.org/wp-content/uploads/2012/01/MNL-no-29-31012012-F-FDTL-PNTL.pdf>. Asesu iha loron 02 Agustu 2016.
- Relatóriu Fundasaun Mahein (FM), 2012. Potensi Ancaman Keamanan Menjelang Pemilu 2012. Mahein Nia Lian No. 19, 28 April 2011.
- Relatóriu Avaliasaun kona-ba Violénsia Armada iha Timor-Leste (TLAVA). Violénsia Eleitorál iha Timor-Leste: identifikasaun no avaliasaun ba insidente no resposta sira. No. 3, Juñu 2009.
- Relatóriu Avaliasaun kona-ba Violénsia Armada iha Timor-Leste (TLAVA). Grupu sira, gang sira no violénsia armada iha Timor-Leste. No. 2, Abril 2009.



Lista ema ne'ebé partisipa iha entrevista no FGD

Nú.	Naran	Pozisaun	Instituisaun/ Organizasaun	Munisipiu
Entrevista pessoal				
1.	Horacio de Almeida	Adjuntu Provedor	PDHJ	Dili
2.	Faustino da Costa	Segundu Komandante Jeral	PNTL	Dili
3.	Henrique da Costa	Komandante Operasaun	PNTL	Dili
4.	Antonio Freitas	Dosente/Observador	UNTL	Dili
5.	Manuel Tilman	Advogado	Manuel Tilman Associetes	Dili
6.	Luis de O. Sampaio	Diretur Ezekutivu	JSMP	Dili
7.	Luis Ximenes	Diretur Ezekutivu	BELUN	Dili
8.	Manuel Monteiro	Diretur Ezekutivu	Assosiasaun HAK	Dili
9.	Abel Amaral	Eis Funsionariu UNMIT	Atual Servisu iha FM	Dili
10.	Juvelino Fernandes	Estudante	UNTL	Dili
Focus group discussion				
11.	Amito Araújo	Jornalista	RTL	Dili
12.	Joao da Costa	Jornalista	Timor Post	Dili
13.	Venidora de Oliveira	Jornalista	The Dili Weekly	Dili
14.	Luciana Ximenes	Jornalista	STL	Dili
15.	Artur da Luz	Jornalista	Independente	Dili
16.	Florianio Soares	Jornalista	Timor Roman	Dili
17.	Eusebio de Oliveira	Jornalista	Diario Nacional	Dili
18.	Quintã Massa	OTD	CEPAD	Manufahi
19.	Angelito Tilman	Juventude		Manufahi
20.	Manuel de Jesus	Juventude		Manufahi
21.	Nicolau da Costa	Juventude		Manufahi
22.	Mariana Alves	Juventude		Manufahi
23.	Eufemia Seixas	Juventude		Manufahi
24.	Natercia Andrade	Juventude		Manufahi
25.	Jorge da Costa	Juventude		Manufahi
26.	Fatima Soares	Juventude		Manufahi
27.	David de Jesus	Juventude		Manufahi
28.	Antonio Afonso	Pesoal Apoiu Suku		Liquiça
29.	Selcinah da Silva	Juventude		Liquiça
30.	Lolita Boavida	Juventude		Liquiça
31.	Luizinha M. D. Horta	Juventude		Liquiça
32.	João Freitas	Juventude		Liquiça
33.	Manuel dos Santos	Juventude		Liquiça
34.	Domingos da Costa	Juventude		Liquiça
35.	Almerio dos Santos	Juventude		Liquiça